

Ambasadori zemalja članica Upravnog odbora u posjeti Brčko Distriktu



Na inicijativu supervizora za Brčko, ambasadora Roderika Mura (Roderick Moore), ambasadori zemalja članica Upravnog odbora Vijeća za provedbu mira danas su posjetili Brčko Distrikt. Tokom više sastanaka održanih u Brki i gradu Brčko, ambasadori su se susreli sa velikim brojem stanovnika Distrikta od kojih su čuli niz različitih mišljenja u pogledu ekonomske, političke i socijalne situacije u Distriktu. Sagovornici ambasadorima bili su učenici, nastavnici, poljoprivrednici, povratnici, nevladine organizacije, poslovni ljudi i članovi izvršnih i zakonodavnih organa.

Ova posjeta predstavlja važnu komponentu u naporima koje je poduzeo supervizor kako bi upoznao ambasadore zemalja članica Upravnog odbora sa trenutnom situacijom u Brčko Distriktu prije naredne sjednice Upravnog odbora Vijeća za provedbu mira koja će se održati 29. i 30. marta. Ova posjeta je došla u pravo vrijeme budući da je nedavno postignuto rješenje pitanja regulacije električne energije i snabdijevanja Brčko Distrikta električnom energijom – što je jedan od uslova koji su ranije bili postavljeni za zatvaranje Arbitražnog tribunala i okončanje supervizije – otvorilo mogućnost za razgovore u okviru Upravnog odbora Vijeća za provedbu mira u pogledu budućnosti međunarodnog angažmana u Brčko Distriktu. Prema Konačnoj arbitražnoj odluci Arbitražnog tribunala, Upravni odbor Vijeća za provedbu mira igra važnu ulogu u donošenju odluke da li režim supervizije treba da se nastavi.

U narednim sedmicama, supervizor i visoki predstavnik će imati pojedinačne konsultacije sa članovima Upravnog odbora Vijeća za provedbu mira u cilju sagledavanja njihovih stavova o Arbitražnom tribunalu i budućnosti supervizije.

Ambasador Mur izražava žaljenje što nije mogao prisustvovati posjeti kako je prvobitno planirano, jer učestvuje u stalnim naporima na iznalaženju rješenja za formiranje vlasti u Federaciji BiH.